

ԲԻԱՅՆԻԼԻ-ՈՒՐԱՐՏՈՒՆ ՎԵՐԵԼՔԻ ՇՐՋԱՆՈՒՄ

Ն. Վ. ՀԱՐՈՒԹՅՈՒՆՅԱՆ

Ասորեստանյան պետության շուրջ շորսդարյա (մ. թ. ա. XIII դարի կեսերից մինչև IX դարի կեսերը) անընդմեջ ռազմական բախումները Նաիրի-ուրարտական ցեղերի ու ցեղային միությունների հետ աստիճանաբար ավելի ու ավելի ծանր կացության մեջ էին դրել վերջիններիս և հետզհետե ջլատել նրանց ուժերը: Նաիրի-ուրարտական ցեղային միությունները ի վիճակի չէին կանխելու Հին Արևելքի այն ժամանակվա հզորագույն պետության՝ Ասորեստանի հուժկու ռազմական արշավանքները, որի պատճառով էլ ասորեստանյան բանակները բազմիցս հաղթաբար անցնում էին Նաիրի-ուրարտական ցեղերի լայնատարած տերիտորիայով՝ սկսած Տիգրիսի վերին հոսանքներից մինչև Ճորոխի ավազանը, հրի ու սրի մատնում տեղական բնակչությանը, ուժից վեր հարկեր ու տուրքեր նշանակում նրանց վրա և հարուստ ու բազմապիսի ավարով վերադառնում Ասորեստան: Քաղաքական այդպիսի բարդ իրադրության պայմաններում, երբ կամա-ակամա դրված էր Նաիրի-ուրարտական ցեղային միությունների լինել-չլինելու հարցը, վերջիններս ստիպված էին տարեցտարի է՛լ ավելի միավորվելու՝ միացյալ ուժերով արժանի հակահարված տալու ահեղ հակառակորդին:

Այդպիսի միավորման ձգտումները հարյուրամյակների ընթացքում ավելի ու ավելի են համախմբում Նաիրի-ուրարտական ցեղերին ու ցեղային միություններին՝ ընդհանուր ճակատ կազմելու Ասորեստանի անընդմեջ ու համառ ռազմական էքսպանսիայի դեմ և, ի վերջո, մ. թ. ա. IX դարի կեսերին վերջնականապես ավարտվում է ուրարտական պետության կազմավորման երկարատև պրոցեսը: Նորաստեղծ պետության թագավորանիստ քաղաքը (մայրաքաղաքը) դառնում է Արզաշկուն¹, իսկ թագավորը՝ Արամեն (Արամուն):

Այսպիսով, մ. թ. ա. IX դարի կեսերից ուրարտական թագավոր Արամեն սկսում է կռել իր պետության հզորությունը և արժանի հակահարվածներով բազմիցս անախորժություններ պատճառում ասորեստանյան թագավոր Սալմանասար III-ին: Արամենի ժամանակ աստիճանաբար ամրանում է Ուրարտուի հզորությունը, իսկ նրա հաջորդի՝ Սարգուրի I-ի օրոք սկսվում է հին-արևելյան այդ պետության երկարատև վերելքը:

¹ Ուրարտուի Արզաշկուն(ն) թագավորանիստ քաղաքի տեղը դեռևս հաստատված չէ: Կարելի է ենթադրել, որ այն ընկած է եղել Վանա լճի հյուսիսային ափերից ոչ հեռու, եթե նկատի ունենանք այն հանգամանքը, որ ասորեստանյան թագավոր Սալմանասար III-ի արձանագրությունների համաձայն Արզաշկուն ընկած է եղել կամ Դայաենիի (ուրարտական Դիաուիի, հայկ. Տայք) և էրիտիա լեռան ու Արմարիլիի (հայկ. Վասպուրական՝ Վանա և Ուրմիա լճերի միջև), կամ Դայաենիի, Տումմեի ու Գիլգանի (Ուրմիա լճի արևմտյան ափին), կամ Դայաենիի, Սուխմեի ու Գիլգանի, կամ էլ սոսկ Դայաենիի ու Գիլգանի միջև: Այդ փաստերը տեղ են գտել հետևյալ աղբյուրներում—И. М. Дьяконов, Ассиро-вавилонские источники по истории Урарту (այսուհետև՝ АВИИУ); „Вестник древней истории“ (այսուհետև՝ ВДИ), 1951, № 2, 3, 4, արձանագրություններ 27 (11, 45), 28 (35), 29, 31, 32:

* * *

Նաիրի-ուրարտական ցեղերի ու ցեղախմբի միությունների կամ ուրարտական պետության կազմավորման շրջանի պատմությունը, ինչպես հայտնի է, լուսաբանված է սոսկ ասորեստանյան սեպագիր աղբյուրներում, քանի որ այս ժամանակ Ուրարտուն գետնւ չէր ստեղծել իր սեփական դիրքը Սակայն սկսած Սարգուրի I-ի (մ. թ. ա. IX դարի երեսնական թվականներ) թագավորության ժամանակվանից Ուրարտուի պատմության վերաբերյալ մեզ անհրաժեշտ տեղեկանքներ են հասել նաև ուրարտական թագավորների թողած արձանագրություններից։ Այս հանգամանքը հնարավորություն է ընձեռում արդեն հնարավոր չափով խուսափելու ասորեստանյան աղբյուրների միակողմանի տվյալներից և Ուրարտուի, ինչպես նաև ուրարտա-ասորեստանյան քաղաքական միջադեպերի պատմությունն ուսումնասիրելու շատ ավելի ճշմարտացի ու բազմակողմանի։

Սարգուրի I-ի քաղաքական դրոշմանություն մասին, դժբախտաբար, աննշան տեղեկություններ են հասել մեզ։ Ասորեստանյան լեզվով կազմած նրա թվով երեք նույնանման արձանագրություններում առանձնապես հետաքրքիր է արքայական տիտղոսաշարը, որում Սարգուրին հռչակում է իրեն «թագավոր մեծ, թագավոր հզոր, թագավոր տիեզերքի, թագավոր Նաիրի երկրի, հավասարը շունեցող թագավոր, ճակատամարտից չվախեցող զարմանալի հովվապետ, անհպատակներին հպատակեցնող»։ Իսկ շարունակության մեջ՝ «թագավոր թագավորաց, որը հարկ է ստացել բոլոր թագավորներից»²։

Սարգուրի I-ի արձանագրությունները, դժբախտաբար, կոնկրետ տվյալներ չեն պարունակում նրա ռազմական նվաճումների վերաբերյալ, ուստի նրանց հիման վրա հնարավոր չէ հստակ եզրակացությունների հանդել Ուրարտուի ռազմական պոտենցիալի և հզորության աստիճանի մասին։ Սակայն արձանագրությունների հենց տիտղոսաշարը, ինչքան էլ որ վերապահության մոտենանք նրան, հաշվի առնելով հին-արեելյան ու հատկապես ասորեստանյան արքաների (որոնցից ընդօրինակված է Սարգուրիի տիտղոսաշարը) պարծենկոտությունը և նրանց արտահայտությունների վերամբարձ ոճը, անշուշտ վկայում է, որ Սարգուրին արդեն գերիշխում էր բազմաթիվ ցեղապետների և մարդերի կառավարիչների վրա, որոնք նախքան ուրարտական պետության կազմավորումը եղել են ինքնուրույն իշխողներ՝ «թագավորներ», իսկ այժմ արդեն ենթարկվում էին ուրարտական թագավորին, որի շնորհիվ էլ վերջինս ձևորէր բերել «մեծ», «հզոր», «տիեզերքի» թագավորի, «թագավորի, որին հավասարը չկա» և, մանավանդ, «թագավորաց թագավորի» տիտղոսը։

Վերահիշյալ եզրակացությունը, իհարկե, ունի որոշակի պատմական հիմք։ Այդ մասին վկայում են հենց Սարգուրի I-ի ժամանակակցի՝ ասորեստանյան թագավոր Սալմանասար III-ի արձանագրությունները։ Բավական է նշել, որ ասորեստանյան թագավորին սոսկ մի անգամ է հաջողվում, այն էլ սկզբնական շրջանում, այս կամ այն չափով ներթափանցել Ուրարտուի արևմտյան երկրամասերը։ Սա արդեն ամենևին նման չէ այն սրընթաց և հաղթական արշավանքներին, որոնք ձեռնարկվում էին ասորեստանյան այս թագավորի

² Corpus Inscriptionum Chaldicarum, Berlin und Leipzig (այսուհետև՝ CICH), I (1928), II (1935), I—2, տող 1—5; Г. А. Меликишвили, Урартские клинообразные надписи, М., 1960 (այսուհետև՝ УКН), I—2, տող 1—5։

կողմից Սարգուրի I-ի նախորդի՝ Արամեի դեմ: Սալմանասար III-ի ղորահրամանատարի՝ Դայան-Աշշուրի մ. թ. ա. 832 թ. ձեռնարկած արշավանքի ծայրագույն կետը լինում է սոսկ Արածանիի ստորին հոսանքի շրջանը, երբ նա կտրում է Արևմտյան Տիգրիսի ակունքներից հարավ ընկած Բիտ-Չամանի երկիրը և, այնուհետև, անցնում Արածանին, ըստ որում Դայան-Աշշուրը անմիջապես դիմադրության է հանդիպում Սարգուրի I-ի կողմից: Այդ մասին ակնարկում է հենց ինքը՝ ասորեստանյան թագավորը:

«Սեղուրի³ ուրարտացին լսելով այդ արշավանքի մասին, — գրում է Սալմանասար III-ը, — հույսը դնում է իր բազմաբանակ ղորքի վրա և դուրս գալիս դեմ-հանդիման, որպեսզի ճակատամարտ տա»: Ճիշտ է, Սալմանասար III-ը հիշատակում է, որ ինքը ընդհարվում է Սարգուրի I-ի հետ և նրան պարտության մատնում՝ «նրա ղինվորների դիակներով լցնելով ընդարձակ տափաստանը»⁴, սակայն ասորեստանյան թագավորի այս խոսքերից, որոնք չափազանց շոր ու ժլատ են, համեմատած այլ հաղթանակների փառաբանումների հետ, ինչպես նաև այն փաստից, որ նա այլևս ոչինչ չի ասում ուրարտական ուրիշ տերիտորիաների նվաճման, ավարառության և այլնի մասին, երևում է, որ Սալմանասարի այս արշավանքը առնվազն լիարժեք հաջողությունների չի հանգեցրել Ասորեստանին: Պատահական չէ, որ Սալմանասար III-ը ինքը խոստովանում է Սարգուրի I-ի ղորքերի բազմաբանակությունը և ճակատամարտը ընդունելու նրա անսասան կամքը:

Հետագայում Ասորեստանը երեք տարի ձեռք չի բարձրացնում Ուրարտուի վրա, իսկ այնուհետև, մ. թ. ա. 829 թ., ասորեստանյան բանակը սոսկ բավարարվում է Վանս լճից դեպի հարավ ընկած հուրուշկիայի⁵ ասպատակությանը, ուր նրա թագավոր Դատանայից հարկ է ստանում⁶: Հատկանշական է, որ Սալմանասար III-ի ղորահրամանատար Դայան-Աշշուրը չի համարձակվում այլևս մտնելու Ուրարտուի տերիտորիայի խորքերը, ուստի վերադառնում է դեպի հարավ-արևելք՝ Ուրմիա լճից հարավ ընկած երկրները (Մանա, Պարսուա): Դայան-Աշշուրը նույնիսկ չի էլ նշում որևէ ճակատամարտի մասին: Շատ հավանական է, որ նա չի էլ եղել առանց այն էլ թշ մեծ հուրուշկիա երկրի ամբողջ տերիտորիայում, քանի որ արձանագրության մեջ սոսկ հիշատակվում է, որ ասորեստանյան ղորահրամանատարը անցել է Ջաբ գետը⁷ և հասել մինչև հուրուշկիայի բնակատեղիները: Ամենից հավանականն այն է, որ Սալմանասար III-ի ղորահրամանատարը հենց հուրուշկիայի հարավային բնակատեղիներում լուրջ դիմադրության է հանդիպել ուրարտական ղորքերի կողմից և այդ պատճառով էլ փաստորեն ստիպված է եղել նահանջելու:

Վերոհիշյալ կարծիքը հիմնավորվում է այն փաստով, որ Սալմանասար III-ը իր թագավորության 32-րդ տարում (մ. թ. ա. 827 թ.) դարձյալ փորձ.

³ Այստեղ Սալմանասար III-ը նկատի ունի Սարգուրի I-ին:

⁴ D. D. Luckenbill, Ancient Records of Assyria and Babylonia, I—II, Chicago, 1926—1927 (այսուհետև՝ ARAB), I, § 584. ABHMY, 28 (141).

⁵ հուրուշկիան տեղադրվում է Վանս լճից հարավ, Բոհտանի (Արևելյան Տիգրիսի) հովտում, նրա աջափնյա հատվածում:

⁶ ARAB, I, § 587. ABHMY, 28 (159). Ասորեստանյան սղբյուրների Դատան կամ Դատանան համապատասխանում է հորխորյան տարեգրության Դադային կամ Դադին: Տե՛ս N. Adontz, Histoire d'Arménie, Paris, 1946, էջ 89:

⁷ Խոսքը, անկասկած, վերաբերում է Մեծ կամ Վերին Ջաբին՝ Տիգրիսի վտակին:

է անում խուրուշկիա ուղարկելու Դայան-Աշշուրին, որը, արձանագրության տվյալների համաձայն, սոսկ մոտենում է այդ երկրի բնակատեղիներին և հարկ ստանում նրա թագավոր Դատայից: Ը դեպ, այս դեպքում ևս, ինչպես նախորդ տարում, ասորեստանյան զորքը նահանջում է դեպի հարավ, ուր նա նախ նվաճում է Մուսասիրի Սասարիա ամրացված քաղաքը՝ 46 այլ բնակատեղիների հետ միասին, հասնում ուրարտական մոտակա ամրոցների, ավերում ու հրկիզում թվով 50 բնակատեղիներ և այնուհետև ընթանում դեպի հյուսիս-արևելք՝ Ուրմիա լճի արևմտյան ափերը, ուր հարկ է ստանում Գիլգանի թագավոր Ուպուից:

Այսպիսով, ակնառու կերպով երևում է, որ Սարգուրի I-ի տիրապետության ժամանակաշրջանում արդեն սկսվում է Ուրարտուի վերելքը, որն արտահայտվում է ամենից առաջ նրա ռազմական հզորությամբ: Սարգուրի I-ի տիրապետության վերջին տարիներին Ասորեստանը այլևս այն աստիճանի սարսափելի հակառակորդ չէր Ուրարտուի համար, ինչպիսին նա եղել էր Արամեի ժամանակ: Ընդհակառակը, ինքը Ուրարտուն տարեցտարի ավելի ու ավելի հզոր ախոյան էր դառնում Հին Արևելքի այն ժամանակվա այդ հզոր պետության՝ Ասորեստանի համար: Այդ երևում է թերևս այն փաստից, որ Սարգուրի I-ի թագավորության մայրամուտին ասորեստանյան արքան սոսկ երկու անգամ է աննշան արշավանքներ ձեռնարկում Ուրարտուի դեմ, որի ընթացքում նրան հաղիվ հաջողվում է լինել վերջինիս այն ժամանակվա տերիտորիայի հարավային և հարավ-արևելյան ծայրամասի միայն երկու երկրների (խուրուշկիա, Սուսասիր) որոշ բնակատեղիներում:

Այստեղ անհրաժեշտ է առանձնապես նկատի ունենալ, որ Ասորեստանի մղած շուրջ 100-ամյա անընդմեջ պատերազմները Առաջավոր Ասիայում իր առաջնությունն ապահովելու համար, բնականաբար, իրենց բացասական կնիքըն էին դրել երկրի ինչպես տնտեսության, այնպես էլ ռազմական հզորության վրա: Դրան պետք է ավելացնել Սալմանասար III-ի թագավորության վերջին տարիներին պետության ներսում ծագած խժոժությունները, որոնք պայմանավորված էին թագավորի կողմից ռազմական գործում Դայան-Աշշուրի առաջաշմամբ: Այդ առթիվ Սալմանասարի որդիներից մեկի մ. թ. ա. 827 թ. հոր դեմ բարձրացրած ապստամբությունը ընդգրկեց թագավորության նշանակալից մասը: Երկպառակությունները շարունակվում են ընդհուպ մինչև Սալմանասարի մահը:

Հետևաբար, Սարգուրի I-ի որոշակի հաջողությունները Սալմանասար III-ի հետ ունեցած կատաղի մարտերում պայմանավորված էին ոչ միայն Ուրարտուի ռազմական հզորության աճով, այլև Ասորեստանի արտաքին ու ներքին քաղաքականության նկատելի անհաջողությամբ:

Շատ ավելի սակավ են մեր տեղեկությունները Սարգուրի I-ի ներքին գործունեության մասին: Հայտնի է, որ նա զգալի շինարարական աշխատանքներ է ձեռնարկել Տուշպայում: Այդ քաղաքի միջնաբերդի մոտ հսկայական քարերով կառուցված պարսպի արձանագրությունները հաղորդում են. «Ես այս քարերը

⁸ И. М. Дьяконов, АВИИУ, 28 (174).

⁹ В. В. Струве, История древнего Востока, М., 1941, էջ 305—306.

բերեցի Ալնիունու քաղաքից¹⁰ (և) կանգնեցրի այս պարիսպը»¹¹։ Սարգուրիի, Լուտիպրիի որդու կողմից Վանի ժայռի մոտ կառուցված միջնաբերդը և պարիսպը հաստատում են ուրարտական կենտրոնի առկայությունը Տուշպա-Վանի տեղում դեռևս հնագույն ժամանակներից սկսած։ Մյուս կողմից, Սարգուրի I-ի շինարարական գործունեությունն առանձնահատուկ նշանակություն է ստանում, եթե նկատի ունենանք, որ վերոհիշյալ պարսպի քարերը (0,75 մետր բարձրությամբ և մինչև 6 մետր երկարությամբ) միանգամայն տարբերվում են Վանի ու նրա շրջանի մյուս օբյեկտների շինանյութից։ Ուստի նրանց բերովի լինելը, գուցե և հեռավոր վայրից, դառնում է անկասկած, թեև Վանի շրջակայքը, ինչպես հայտնի է, քարի պակաս չունի։ Այդ հանգամանքը վկայում է ոչ միայն այն առանձնահատուկ ուշադրությունը, որը նվիրել է շինարարական օբյեկտներին Սարգուրի I-ը, այլև նրա ժամանակվա ուրարտական պետության հսկայական նյութական հնարավորությունների ասպարեզին է։

Այսպիսով, Սարգուրի I-ի ժամանակ իր արտացոլումն է գտել շինարարական այն գործունեության սկզբնական փուլը, որը մեծ թափ ստացավ ու հսկայական ծավալի հասավ ուրարտական հաջորդ թագավորների օրոք։ Այդ գործունեության հերթական փուլին հանդիպում ենք Սարգուրի I-ի որդի Րշպուինի թագավորի ժամանակ։

* * *

Րշպուինիի թագավորությունը տեղի է շուրջ մեկ ու կես տասնամյակ (IX դարի վերջին քառորդում), ըստ որում դրա մի զգալի մասը նա տիրապետել է գահին իր որդու՝ Մենուայի հետ համատեղ։ Իշպուինիի թագավորության ժամանակվանից սկսած արդեն հանդես է գալիս ուրարտերեն գիրը և մեզ հասել են արձանագրություններ՝ Ուրարտուի կյանքի այլևայլ բնագավառների մասին։

Րշպուինիի մեզ հասած արձանագրությունները թվել սահմանափակ են¹² և բացառապես շինարարական բնույթ ունեն։ Շինարարական օբյեկտների կառուցման տեղերն են Ուրարտուի մայրաքաղաք Տուշպան (Վան) ու նրա շրջակայքը (Ոսկերակ, Ծվաստան, Լեսկ), Արածանիի վերին հոսանքը (Բադնոց)։ Իշպուինին զերադանցապես զբաղվել է երկրի պաշտպանության ամրապնդմամբ։ Ուստի նրա շինարարական գործունեության մեջ առանձնակի տեղ է գրավում պաշտպանական օբյեկտների ամրոցների կառուցումը։

Թեև Իշպուինիի միանձնյա թագավորության ժամանակվանից ռազմաքաղաքական բնույթի ուրարտական արձանագրություններ չեն հասել մեզ, սակայն ասորեստանյան թագավոր Շամշի-Ադադ V-ի թողած գրավոր աղբյուրներից հայտնի է, որ Իշպուինիի օրոք Ուրարտուի տերիտորիան զգալի չափով ընդլայնվել էր հարավ-արևելյան ուղղությամբ։ Ահա թե ինչու Ուրմիա լճից հարավ ընկած Շուրդիրան (Մանալի կաղմում, նրա հարավային ծայրամասում), որը մ. թ. ա. 323 թ. նվաճվում է Շամշի-Ադադ V-ի կողմից, համար-

¹⁰ Ալնիունու քաղաքի տեղը առայժմ պարզված չէ։ Լեֆան-Հուսպը և Վ. Բելքը կարծում են, որ Սարգուրիի կառուցած պարսպի քարերը պետք է բերված լինեն հեռավոր վայրից՝ Վանա լճի վրայով Մանապկերտի շրջանից։ C. F. Lehmann-Haupt, Armenien einst und jetzt, II, 2. Berlin und Leipzig, 1931, էջ 19—20։

¹¹ CICH, 1—2, տող 6—7։ ՄԿԽ, 1—2, նույն տողերը։

¹² Г. А. Мелникшвили, ՄԿԽ, 4—18։

վում է Ուրարտուի քաղաքը¹³։ Այնուհետև, մ. թ. ա. 822 թ. ղեպի «Արևամուտի ծովը»¹⁴ ձեռնարկած արշավանքի ժամանակ ասորեստանյան հիշյալ թագավորի ղորահրամանատար Մուտարրիս-Աշշուրը նվաճում է Իշպուինիի¹⁵ 11 ամրացված քաղաքներ՝ 200 շրջակա բնակատեղիների հետ միասին, իսկ վերադարձին, որպես հարկ, լծկան ձիեր է ստանում նաիրյան թագավորներից։ Շատ հավանական է, որ այստեղ Շամշի-Ադադ V-ը նկատի է ունեցել Ուրմիա լճի արևելյան մասում ընկած տերիտորիաները և հատկապես Սուրի, Բարի մարդերը, որոնք իսկապես եղել են զարդացած ձիարուծական կենտրոններ։

Իշպուինիի թագավորության օրոք արդեն Ուրարտուն ավելի ու ավելի լուրջ ախոյան էր դառնում Ասորեստանի համար։ Ահա թե ինչու Շամշի-Ադադ V-ին սոսկ մի անգամ է հաջողվում ներխուժել Ուրարտուի կենտրոնական մարզերից մեկը՝ Խուբուշիա, որն ընկած էր Վանա լճից ղեպի հարավ (Բոհտանի հովտում)։ Սակայն պետք է ենթադրել, որ այս արշավանքի արդյունքները ևս Ասորեստանի համար առանձնապես արդյունավետ չեն եղել, եթե նկատի ունենանք, որ ասորեստանյան ղորքը ստիպված է լինում նահանջելու հարավ-արևելելյան ուղղությամբ՝ Մանայի, Պարսուայի և Գիդիլբունդայի տերիտորիաներով¹⁶։

Շամշի-Ադադ V-ը հոր՝ Սալմանասար III-ի մահվանից հետո ղդալի ջանքերի ղնով, դուցե և Բարեթնի աջակցությամբ, կարողանում է վերջ տալ թագավորական իշխանության դեմ ձեռնարկված ու տարիներ ի վեր շարունակվող երկպառակություններին և կրկին վերամիավորել Ասորեստանը։ Դրա շնորհիվ որոշ նախադրյալներ են ստեղծվում փոքրիշատե վերականգնելու պետության տնտեսական ու ռադմական նկատելիորեն խարխլված հիմքերը։ Սակայն Շամշի-Ադադը, այնուամենայնիվ, ի վիճակի չի լինում Ասորեստանին լիովին վերադարձնելու նրա երբեմնի հղորությունը։ Ի տարբերություն իր նախորդների, Շամշի-Ադադը այլևս հավակնություն չի ունենում Եփրատն անցնելու և իր հեղեմոնիան ապահովելու Ասորիքում¹⁷։ Ուրարտուն, ընդհակառակը, ասլրում էր աննախընթաց վերելքի ժամանակաշրջան։

Իշպուինիի օրոք Ուրարտուի տերիտորիան հարավ-արևելյան ուղղությամբ արդեն ղդալի շափով ընդլայնվել էր։ Ինչպես վերևում տեսանք, հենց իր՝ Շամշի-Ադադ թագավորի խոստովանությամբ, Ուրմիա լճից ղեպի հարավ ընկած Շուրդիրա քաղաքը, որն ավելի ուշ ժամանակներում հանդես է գալիս Մանայի կաղմում, պատկանում էր Ուրարտուին։

Ուրարտուի քաղաքական պատմության մեջ, սակայն, առանձնակի աշխուժություն է նկատվում հատկապես այն ժամանակվանից, երբ Իշպուինիի թագավորական ղործերին մասնակից է անում իր որդուն՝ Մենուային։ Մեղ հասել են ոչ մեծաթիվ, սակայն ղդալի արժեք ներկայացնող արձանագրություններ՝ Իշպուինիի և Մենուայի համատեղ թագավորության վերաբերյալ¹⁸։

13 Н. М. Дьяконов, ВВШШ, 34.
14 Ննթաղրվում է, որ պետք է լինի Կասպից ծովը։
15 Այստեղ Իշպուինին հիշատակվում է Ուշպինա ձևով, Sêʾu ARAB, I, § 717.
16 D. D. L u c k e n b i l l, ARAB, I, § 718, 719.
17 В. В. С т р у е, История древнего Востока т. 306: Н. М. Дьяконов. Развитие земельных отношений в Ассирии, Л., 1949, т. 84.
18 Г. А. Меликишвили, УКН, 19—27.

Իշպուհինիի և Մենուայի միացյալ ջանքերով Ուրարտուի սահմանները ըսկըսում են ընդլայնվել և՛ հարավ-արևելյան, և՛ հյուսիսային ուղղությամբ: Հարավ-արևելքում, օրինակ, նրանց նախ տեսնում ենք Արդինի-Մուսասիրում՝ Մեծ Զարի (Տիգրիսի վտակի) վերին հոսանքի շրջանում, ուր երկրի նվաճումից հետո կառուցվում են պաշտամունքային օբյեկտներ և այդ առթիվ զոհաբերություններ մատուցվում ուրարտական աստվածներին¹⁹: Իսկ այնուհետև Իշպուհինիի և Մենուայի հաղթական արշավանքները է՛լ ավելի մեծ հաջողություններ են բերում Ուրարտուին: Մուսասիրից հետո նրանք հետագայում հասնում են Մեիշտա քաղաքը²⁰ և ապա ընդհուպ մինչև Դիալայի (Տիգրիսի վտակի) ակունքները, ուր նվաճում են Բարշուա (Պարսուա) երկիրը և մեծահարուստ ավարով վերադառնում Ուրարտու²¹: Այսպիսով, Ուրարտուն մարտահրավեր է նետում Ասորեստանին՝ ընդհուպ մոտենալով նրա բուն տերիտորիային արևելքից:

Հյուսիսային ուղղությամբ ձեռնարկված արշավանքների ընթացքում Իշպուհինիի և Մենուայի հասնում են մինչև Առաքս դեպի վերին հոսանքները և նվաճում Ուիտերուխին, ապա էլ ավելի հյուսիսում՝ Լուշան և Կատարդան: Նույնիսկ հյուսիսում ընկած էթիունյան հզոր ցեղային միության ակտիվ միջամտությունը ի վիճակի չի լինում խոչընդոտելու ուրարտական զորքերի հաղթարշավին: Եվ այդ հաղթանակների արդյունքներն այնքան զգալի ու էական են լինում ուրարտական պետության համար, որ Իշպուհինիի և Մենուայի անհրաժեշտ են գտնում այդ փաստը արձանագրելու միանգամից չորս սեպագիր հուշարձաններում²²:

Այսպիսով, Իշպուհինիի և Մենուայի համատեղ գահակալության ժամանակաշրջանում Ուրարտուն զգալի թվով նոր երկրներ ու ցեղային տերիտորիաներ է ներգրավել իր կազմում: Այդ երկրներում իր տիրապետությունը վերջնականապես աստիճանավելու նպատակով ուրարտական իշխողները գործի են դնում ոչ միայն իրենց ռազմական հզոր մեքենան, այլև իր ժամանակին նրան համարյա չզիջող կրոնը: Ահա թե ինչու աստիճանաբար ուրարտական պանթեոն են ներմուծվում նորանոր ցեղերի աստվածներ, որոնց շնորհիվ «ուրարտական» աստվածների ընդհանուր թիվն անցնում է 50-ից: Դրանց կողքին գոյություն ունեին «երկրների», «լեռների», «լճերի», ինչպես նաև Արդինի (Մուսասիր), Կումենու, Տուշպա քաղաքների աստվածներ և այլն: Ի դեպ, տարածաչքի ընկնող ռազմական հաղթանակների առթիվ Իշպուհինիի և Մենուայի ուրարտական տաճարների պատվին աստվածներին մատուցում են համատարած զոհաբերություններ, որոնց մասին բավականաչափ մանրամասն պատմում է «Մհերի դոան» հայտնի պաշտամունքային արձանագրությունը²³:

* * *

Ուրարտուն հսկայական առաջընթաց է ապրում ռազմա-քաղաքական տեսակետից հատկապես IX դարի վերջերից սկսած, այսինքն՝ Մենուայի (810—

¹⁹ ClCh, 12.

²⁰ Մեիշտան գտնվել է Ուրմիա լճից դեպի հարավ՝ Մանա և Պարշուա երկրների սահմանագլխին:

²¹ ClCh, 15.

²² YKH, 20—23.

²³ YKH, 27.

286 թթ. մ. թ. ա.) միանձնյա թագավորության ժամանակաշրջանում: Երկրի պաշտպանունակությունը ապահովելու և հետագայում նրա տերիտորիան ընդլայնելու նպատակով Մենուան զբաղվում էր ռազմական ամրոցների շինարարությամբ կենտրոնական և ծայրամասային մարզերում: Վանա լճի շրջակայքում, օրինակ, նա կառուցում է բազմաթիվ ամրոցներ, որոնց մասին պատմում են Գյուղակում, Գործոտում, Անդաֆում, Կոխրանցում, Նոր դյուղում, Շուշանցում և Վարագ-կիլիսայում հայտնաբերված արձանագրությունները²⁴: Ուրարտուի կենտրոնական մասում Մենուայի ձևով արկած շինարարական աշխատանքներում առանձնահատուկ տեղ է զբաղում շուրջ 80 կմ երկարությամբ ջրանցքը, որը ջուր է մատակարարում պետության մայրաքաղաքին՝ Տուշպային²⁵: Չնայած իր ավելի քան երկու և կես հազարամյա վաղեմությանը, այդ ջրանցքը մինչև օրս շարունակում է գործել:

Այնուհետև Մենուան իր ուշադրությունը սեփական է հյուսիսային մարզերի վրա, ուր ամրոց-քաղաքներ է հիմնադրում նաև Արածանիի վերին հոսանքում (Մանազկերտ, Բաղնոց)²⁶ և ապա էրզրումի շրջանում (Դիլիբարա, Պասինլեր)²⁷ ու Արաքսի վերին հոսանքում (Բաշ-Ղուլաղ՝ Դաշրուրունի մոտակայքում)²⁸:

Ամրոցների կառուցումը, բնականաբար, Ուրարտուի համար հսկայական հնարավորություններ է ստեղծում ոչ միայն ամուր հաստատվելու նվաճված երկրներում և ապահովելու սեփական անվտանգությունը, այլև ռազմական արշավանքներ նախաձեռնելու և նորանոր երկրներ ու մարզեր ներգրավելու իր կազմի մեջ:

Իծրախտարար մեղ չի հասել Մենուայի տարեգրության ամբողջական տեքստը: Հայտնի են միայն նրա առանձին հատվածներ²⁹: Ուստի հնարավոր չէ պարզել Մենուայի քաղաքական նվաճումների ժամանակադրական կարգը: Սակայն նկատի ունենալով Ուրարտուի արշավանքների ուղղությունները և նրա հակառակորդ երկրների տնտեսական ու ռազմական մակարդակը, կարելի է հանդել շատ թե քիչ ճշմարտացի եզրակացությունների:

Ուրարտուի հյուսիսային հակառակորդները (էրիկուախի, էթիունի, Դիաուխի) իրենց զարգացման ընդհանուր մակարդակով ավելի ցածր էին, քան արևմտյան ու հարավ-արևմտյան (Խատե, Իշալա կամ Իցալա, Ալզի, Ուլիբա, Մելիտեա և այլն) և հատկապես հարավ-արևելյան մրցակիցները (Մանա, Բարշուա և այլն): Էլ չենք խոսում այն մասին, որ հարավ-արևելքում ունեցած բախումների ժամանակ Ուրարտուն վերջին հաշվով գործ ուներ Առաջավոր Ասիայի առավել հզոր տերության՝ Ասորեստանի հետ: Ուստի, Մենուայի թագավորության սկզբնական շրջանում ռազմական արշավանքները, բնականաբար, պետք է ուղղված լինեին դեպի հյուսիս, ուր նա գործ ուներ նվազ զարգացած ցեղերի ու ցեղային միությունների հետ, որոնց հասարակական կառուցվածքում նոր էին միայն առաջանում դասակարգային շերտավորման սաղմերը:

²⁴ УКИ, 66, 67, 71, 73, 77, 78, 91.

²⁵ УКИ, 43—56; Н. В. Арутюнян, Земледелие и скотоводство Урарту, Ереван, 1964, էջ 16—23.

²⁶ УКИ, 72. և Посл., 1.

²⁷ УКИ, 68, 69.

²⁸ УКИ, 70.

²⁹ УКИ, 28.

Այստեղ Մենուային տեսնում ենք նախ Արածանիի վերին հոսանքում՝ Մանադկերտի շրջանում, որտեղ նա ձեռնարկում է բազմաթիվ շինարարական աշխատանքներ (ոռոգող ջրանցքների անցկացում, սլաղատու և խաղողի այգիների տնկում)³⁰։

Այնուհետև Մենուան աստիճանաբար բարձրանում է դեպի հյուսիս՝ Արաքսի վերին հոսանքը, Ղարսի շրջանը և Ճորոխի ավազանը։ Հյուսիսում Մենուան հասնում է ընդհուպ մինչև բարձրանիստ Արարատի հյուսիսային փեշերը, Արաքսի աջ ափը, որտեղ նա նվաճում է էրիկուախի երկիրը՝ Լուխիունի արքայական քաղաքով։ Թե որքան մեծ նշանակություն է տվել ուրարտական թագավորը դեպի հյուսիս ձեռնարկած իր այս ոազմական արշավանքին և հիշյալ տերիտորիայի նվաճմանը, կարելի է դատել թերևս այն փաստից, որ այդ հաղթանակի առթիվ նա թողել է մի ամբողջ շարք արձանագրություններ³¹։ Էրիկուախի երկրի նկատմամբ տարած հաղթանակը ամրապնդելու և Ուրարտուի նվաճողական արշավանքները հետագայում դեպի Արաքսի ձախափնյա հատվածը շարունակելու նպատակով ուրարտական թագավորը այդ երկրի տերիտորիայում՝ Արաքսի աջ ափին կառուցում է Մենուախինիլի քաղաք-ամրոցը³²։

Հյուսիսում Ուրարտուի հաջորդ զոհը դառնում է էթիունի ցեղային միությունը, որի լայնատարած տերիտորիան ձգվում էր Սարիղամիշի շրջանից մինչև Սևանա լճի հյուսիս-արևմտյան ափերի մոտակայքը³³։ Այստեղից ուրարտական թագավորը քշում է զգալի թվով խոշոր եղջերավոր անասուններ, ձիեր և այլն³⁴։ Էթիունիի դեմ տարած հաղթանակը հսկայական չափով ամրապնդում է Ուրարտուի դիրքերը հյուսիսում ու զգալի նախադրյալներ ստեղծում նորանոր նվաճողական արշավանքների համար։

Է՛լ ավելի ուժեղ հակառակորդի հետ զործ ունեն Ուրարտուն հյուսիս-արևմուտքում՝ էրզրումի շրջանից մինչև Ճորոխի ավազանը ձգված տերիտորիայում։ Այստեղ նա իր ուժերը չափում է Դիաուխի³⁵ հզոր ցեղային միության հետ և հաղթանակ տանում։ Դիաուխիի թագավոր Ուտուպուրշին անձնատուր է լինում և ծունկի դալիս Մենուայի առջև։ Վերջինս նրան ներում է շնորհում՝ հարկ վճարելու պայմանով։ Եվ, իսկապես, ուրարտական թագավորն այստեղ ստանում է ոսկի, արծաթ և այլն³⁶։

Այսպիսով, Դիաուխի, էթիունի, էրիկուախի և այլ երկրների դեմ տարած հաղթանակը զգալի չափով ամրապնդում է Ուրարտուի դիրքերը հեռու հյուսիսում և ապահովում նրա թիկունքը թշնամական ոտնձգություններից։ Մենուան արդեն բավականաչափ հնարավորություններ է ձեռք բերում իր սահմանները ընդլայնելու նաև արևմտյան և հարավ-արևմտյան երկրների տերիտորիաների

³⁰ Н. В. Арутюнян, Даниэла-тинн, ЗУУЗ ԳԱ «Տեղեկագիր» (հաս. գիտ.), 1957, № 4, էջ 98—106։

³¹ УКН, 30—34.

³² Նույն տեղում, 70։

³³ Н. В. Арутюнян, Заглавные декларации урартских надписей и их значение при изучении вопросов топонимики, ЗУУЗ ԳԱ «Տեղեկագիր» (հաս. գիտ.), 1954, № 8, էջ 86—87։

³⁴ УКН, 38, տող 2—4։

³⁵ Նույնական է ասորեստանյան արձանագրությունների Դայաենիի, անտիկ աղբյուրների Տաոխների, հայկական Տաթի և վրացական Տաոյի հետ։

³⁶ CICH, 27. УКН, 36. Դիաուխի երկրի Շաշիլու արքայանիստ քաղաքի նվաճման մասին պատմում է նաև УКН, 37 արձանագրությունը։

հաշվին: Այստեղ նա հաղթանակ է տանում Մուսիանի (հայկական Մուսի), Մե-
լիտեա (հայկական Մալաթիա), Ուրմե³⁷, Ալդի (հայկական Աղձնիք), Խատե³⁸,
Ուլիբա³⁹ և այլ երկրների նկատմամբ⁴⁰:

Այսպիսով, հյուսիսային, արևմտյան և հարավ-արևմտյան մի ամբողջ
շարք երկրների տերիտորիաների նվաճումը այն աստիճան ապահովում է Ու-
րարտուի հզորությունը, որ նա արդեն իրեն լրիվ նախապատրաստված է հա-
մարում վճռական ճակատամարտի բռնվելու է՝ ավելի հզոր ախոյանների հետ
հարավ-արևելքում: Այստեղ պատերազմի թափերակ է դառնում Մանա եր-
կիրը, որի տերիտորիան ընկած էր Ուրմիա լճից դեպի հարավ և արևելք: Սա-
կայն անհրաժեշտ է նկատի ունենալ, որ ոտնձգություններ անելով Մանայի
լայնատարած տերիտորիայի նկատմամբ, Ուրարտուն վերջին հաշվով մարտա-
հրավեր էր նետում Առաջավոր Ասիայի հզորագույն տերությունը՝ Ասորեստա-
նին, քանի որ Մենուայի տիրապետության ղեկավար սկզբնական շրջանում, երբ
նա զբաղված էր հյուսիսային, արևմտյան ու հարավ-արևմտյան երկրների նը-
վաճման հարցերով, Ասորեստանն արդեն երկու տարի շարունակ (807—806
թթ.) արշավանքներ էր ձեռնարկում Մանայի դեմ⁴¹: Հետևաբար, հասկանալի
է, որ Մանային տիրապետելու հարցում անխուսափելիորեն պետք է բախվելին
Ուրարտուի և Ասորեստանի շահերը:

Նվ իսկապես, մի կողմից ուրարտական թագավոր Մենուան է կրկնակի հի-
շատակում իր տարած հաղթանակի մասին Մանայի նկատմամբ⁴², մյուս կող-
մից՝ նրա ժամանակակից ասորեստանյան թագավոր Ադադներարի III-ը⁴³:
Հասկանալի է, որ Մանան ժամանակ առ ժամանակ հանդիսացել է կուլախնձոր
այդ հզորագույն պետությունների միջև, ըստ որում ռազմական բախումները
փոփոխակի հաջողություններ են բերել մերթ մեկ, մերթ մյուս կողմին: Մի
փոքր ավելի ուշ, որոշ ընդհատումներով (801 և 791 թթ. մ. թ. ա.), Ասորես-
տանը ռազմական արշավանք է ձեռնարկում Խուրուշկիայի դեմ⁴⁴: Սակայն
Ուրարտուն, ըստ երևույթին, թեկուզ ժամանակավորապես կարողացել էր ընկ-
նել Ասորեստանին և այն էլ ոչ միայն Մանային տիրապետելու հարցում: Այդ
երևում է հենց այն փաստից, որ դեպի հարավ-արևելք ձեռնարկած արշավանք-

³⁷ Այս երկրի նվաճման մասին պատմում են Մուշում և Տրմերգում (Մուշի շրջանում) հայտ-
նաբերված արձանագրությունները: Ուրմեի կողմերի քաղաքը նույնական է ասորեստանյան աղ-
բյուրների Շուպրիա երկրի կողմերին:

³⁸ Մենուան, ըստ երևույթին, նկատի ունի խեթների այն մնացորդներին, որոնք պետու-
թյան անկումից հետո հաւատարմվել էին Արածանիի և եփրատի խառնարանից դեպի հարավ-արև-
մուտք, Մալաթիայից ոչ հեռու:

³⁹ Նույնական է խեթական Ուլիլիի և ասորեստանյան Ուլիբայի կամ Ուլլուբայի հետ:
Համապատասխանում է այժմյան Խուլսպին, որը գտնվում է Մուշից մոտավորապես 40—50 կմ
դեպի հարավ-արևմուտք: Տե՛ս Bedrich Hrozný, Naram-Sin et ses ennemis d'ap-
rès un text Hittite, „Archiv Orientalni“, Praha, 1929, vol. I, № 1, էջ 68, E. Forrer,
Die Provinzeinteilung des assyrischen Reiches, Leipzig, 1921 (այսուհետև՝ PAR),
էջ 85, N. Adontz, նշվ. աշխ. էջ 106:

⁴⁰ YKH, 28, 39, 40, 41.

⁴¹ Տե՛ս ABHUY, 39 (ВДН, 1951, № 2, էջ 305):

⁴² CICH, 19—20; YKH, 28—29.

⁴³ E. Schrader, KB, I, էջ 190; И. М. Дьяконов, ABHUY, 35. Այստեղ
Մանան հիշատակվում է Մուենուե ձեռքով:

⁴⁴ E. Forrer, PAR, էջ 40—48; И. М. Дьяконов, ABHUY, 39.

ներից մեկի ժամանակ Մենուային հաջողութիւն է հասնել ընդհուպ մինչև Ասորեստանի սահմանները⁴⁵։

Այսպիսով, Մենուայի ռազմական նվաճումների շնորհիւ Ուրարտուն տարեցտարի ավելի ու ավելի գերիշխող տեղ է գրավում Առաջավոր Ասիայում։ Մենուայի թագավորութեան վերջին շրջանում արդեն (մ. թ. ա. VIII դարի սկզբներին) Ուրարտուն հարավում և հարավ-արևելքում (Խուբուշիա, Մանա) և արևմուտքում (Վերին Եփրատի ավազանում) ղդալի շնախորժութեւններ է պատճառում Ասորեստանին։ Աստիճանաբար հաւասարակշռութիւն են Ուրարտուի և Ասորեստանի ուժերը։ Վրա է հասնում Վանի թագավորութեան ծաղկման դարաշրջանը և նա նախապատրաստութիւն է ապագա էլ ավելի հուժկու ճակատամարտերի, որոնք արդեն բաժին են ընկնում Մենուայի հաջորդներին՝ Արդիշտի I-ին և Սարգուրի II-ին։

БИАЙНИЛИ-УРАТУ В ПЕРИОД ВОЗВЫШЕНИЯ

Н. В. АРУТЮНЯН

(Р е з ю м е)

На основании данных урартских и ассирийских клинописных источников в статье рассматривается военно-политическая история Бияйнили-Урарту в период его возвышения. Под указанным периодом подразумевается отрезок истории Урарту, продлившийся около одного века—начиная со времен правления Сардури I (30-е годы IX в. до н. э.) вплоть до конца царствования Менуа (первая четверть VIII в. до н. э.).

При Сардури I, вероятно, в значительной мере укрепились позиции Бияйнили-Урарту на политической арене Передней Азии. Об этом свидетельствуют царская титулатура Сардури I («царь вселенной, царь, подчиняющий непокорных» и т. д.) и сведения ассирийских надписей о контрударах Сардури I Саламанасару III при попытках последнего проникнуть в западные, южные и юго-восточные пределы Урарту. Следует также учесть, что военные успехи Сардури I были обусловлены не только возвышением Урарту, но и внутренними неурядицами Ассирии.

Более крупных успехов достигло Ванское царство при царстве Ишпуини. В период его самостоятельного правления юго-восточные границы Урарту доходили до территорий к югу от Урмийского озера, а при совместном правлении Ишпуини и Менуа—вплоть до истоков реки Дияла (приток Тигра). На севере же Ишпуини и Менуа достигли верховьев реки Аракс (Унтерухи), а затем севернее их покорили области Луша и Катарза.

Дальнейшее усиление военной мощи Бияйнили-Урарту происходит особенно при самостоятельном правлении Менуа (810—786 гг. до н. э.), который ведет завоевательную политику сразу в трех основных направлениях—на севере и северо-западе, западе и юго-западе, юго-вос-

⁴⁵ CICH, 19, վերին կողմը, տող 13; УКИ, 28, նույն կողմը և տողը։
4 Հանդես, № 4

токе. Границы влияния Бнайнили-Урарту на севере и северо-западе при Менуа доходили до района Карса и бассейна Чороха, на западе и юго-западе — до заевфратских областей Мелитеа и Хате, на юго-востоке — до Манейского царства и даже до границ самой Ассирии, основного и грозного соперника Ванского царства.

К концу царствования Менуа силы Ассирии и Урарту на Переднем Востоке уравниваются. Наступает период расцвета Урарту, когда подготавливаются ожесточенные столкновения с Ассирией для обеспечения первенства в Передней Азии, которые имели место при преемниках Менуа—царей Аргишти I и Сардури II.